

德壯果公年譜

德壯果公年譜卷三十二

次孫花沙納恭纂

嘉慶十二年丁卯

公六十三歲

正月初十日

公偕勒保全保方維甸薛大烈奏言竊

臣

勒保於十二月

二十九日酉刻據四川太平協副將羅思舉署太平廳同

知袁仕繡稟稱轉據東鄉縣馳報有達縣丁役杜朝翰奔

至東鄉之大成寨口稱二十二日三更時綏定府城內新

兵滋事焚燒衙署搶劫居民文武官員不知下落等情

臣

等接閱之下不勝駭異查綏定營係川北鎮統轄添有鄉
勇入伍新兵今敢乘夜搶掠焚燒衙署不法已極究有賊
數若干如何起事官員是否被害未據明晰稟報惟恐游
手匪徒聞風附和易於聚集目下川北鎮總兵田朝貴業
已解任前來漢中附近綏定地方並無重兵必應趕緊徵
調厚集兵力一鼓殲除庶不致蔓延勾結臣勒保前調防
邊川兵因甯陝換防之兵均已安靜起程業經撤歸營伍
現今田朝貴取道平溪壩一路就近回川先調川北兵一
千名前赴綏定進剿尙恐兵力稍單並飛調松潘兵二千
名永甯等營兵一千名重慶兵一千名前來剿辦各處官

兵距綏定近者亦須正月二十四五日方能到齊

臣勅保

現已起程由廣元保留行走一俟松潘兵到川北卽帶領
馳赴田朝貴一路督勦彼時如賊匪西竄卽可迎截並可
顧住賊竄嘉陵江之路其永甯重慶官兵應由順慶行走
已飛咨提督豐紳卽帶此項兵丁前來會勦至陝南漢南
一帶在在與川省連界而定遠西鄉與綏定所屬之太平
廳尤爲毗連萬一賊匪北竄卽可入陝亦須預爲布置

臣德楞泰受

恩深重不敢稍分畛域現擬就近先派甯陝陝安漢中等營新兵
二千名並尙未撤回之固原兵二百餘名交

臣薛大烈並

楊遇春等赴邊界查探賊情如賊向東北奔竄距陝較近
卽行入川會勦臣德楞泰現調滿營馬隊二百名軍標兵
五百名擬調固原兵一千五百名一俟到時卽帶同解任
之總兵游棟雲等馳至定遠一帶相機督辦如陝兵入川
邊界尤須嚴密臣全保亦卽帶吳廷剛並擬調河州兵一
千五百名前赴西鄉防堵臣方維甸在漢中督辦後路彈
壓地方並查在營新兵務期兵食充裕民心鎮定不敢稍
有懈怠至方柴關潰兵一案臣等甫將蘇勒芳阿及解任
之總兵田朝貴游棟雲調到訊明大概情形錄取供詞適
稟到綏定兵丁滋事查方柴關打仗時前敵卽有川北新

兵現正調該鎮兵勦賊未便紛紛提質致啟驚疑若川北兵丁未到仍恐陝甘各營將弁無從指實互相推諉相應請

旨暫緩提質俟川省事竣再行嚴究

十一日

公偕全保方維甸薛大烈奏言臣等奏報綏定府城新兵

滋事一案茲於初四日酉刻續據署甯遠廳知府朱秉忠都司呂天俸稟稱探得四川副將桂涵等帶領前此派出巡緝兵勇於十二月二十七日行抵綏定府亭子鋪聞該逆等在麻柳場地方遊弈隨即率領兵勇追往勦殺大魚

全勝已將爲首叛兵孔傳仕王得先並劉姓等三名擒獲其餘殺斃生擒者甚衆餘匪僅止二十餘名現在緊跟搜捕指日即可竣事等語旋據太平廳袁仕繡以勒保尙在漢中差役姜清何泗朝二名齎稟前來所稟亦屬相同並面詢該役等據稱綏定城文武並未被傷各等情查此起叛匪未及一旬卽經撲滅此皆仰賴

聖主洪福得以迅速殲洗實屬大快人心其所贖二十餘人月內自己悉數擒獲臣等前擬酌派甘省官兵尙未擬調其滿營軍標並陝省綠營官兵現已飛檄停止理合恭摺奏

聞上慰

聖懷至叛匪等起事緣由並糾集人數及在事出力將弁兵丁勒保自卽詳查具奏

諭曰初十日申刻據德楞泰等奏到川省綏定府城新兵滋事一摺當卽指示一切令軍機大臣擬寫諭旨欲於次日發去十一日早間旋據德楞泰等奏到接川省文武稟報滋事叛匪業經副將桂涵等帶兵於麻柳場地方剿殺全勝將首逆擒獲其餘殺斃生擒者甚眾餘匪僅止二十餘人等語綏定新兵敢於糾眾焚燒衙署搶劫居民不法已極實堪痛恨茲仰賴

上天嘉佑得以迅速撲滅不致蔓延荼害生民實深欣慰德楞泰等接到稟報已將前此調派之陝省滿營軍標並綠營官兵飛

檄停止現在陝省邊界甯謐無事但飭知毗連川省文武官弁如殺定勦贖之餘匪二十餘人有潛行逃竄入界者立即拏獲報明嚴辦其方柴關潰兵一案昨據已查明大概情形係屬先勝後敗尙非遇賊卽退此時勒保已回川省諭令查辦叛匪事竣後卽接查川北潰兵之事不必再來漢中所有西安滿營及陝甘綠營官弁兵丁前此潰逃情罪著德楞泰全保方維甸薛大烈卽會同提質明確奏明懲辦

二十日

公偕全保方維甸薛大烈奏言

臣

等連日傳到甯陝案內

辭伍遞籍之洪貴張學科伍正元羅洪陞屈辛成楊明周

貴陳國順八名到案查訊均係辭伍遞籍在先誠如

聖諭與聞知換防脫逃者情罪尙覺有間應卽遵

旨將該八犯發往黑龍江給兵丁爲奴又拏獲歸伍後脫逃叛匪
熊玉一名於訊明後卽行正法其餘仍飭嚴行通緝分別
辦理至此項降匪該營員等並不先期報明率准辭伍遞
籍亦未稟報應卽查明職名咨部議處至永遠防戍降匪
現在造具年貌清冊卽分別飛咨新疆各該城辦事大臣
查照內有派赴烏什之甯陝城守營降匪張元友一名於
起程時潛逃現亦嚴緝於獲日卽行正法應於冊內扣除
奏入報

聞

同日公偕全保方維甸又奏言

臣等前奉

諭旨將甯陝廳議建城垣一事覆查核辦查甯陝廳原名五郎廳撫民同知駐紮管轄山內民人與州縣無異從前捐修土堡卽係廳城其甯陝鎮城在廳城迤南十里有餘地名老關口於添設甯陝鎮總兵時始建鎮城與甯陝廳並不同城臣等前此查辦營制原因甯陝鎮兵必須大加裁減祇留參遊營分是以鎮城殘缺雖多祇須修葺未請改建惟甯陝廳城係同知治所衙署兵房倉庫監獄及商賈民人皆在其中現在全行殘毀必須改建應請將甯陝廳城擇

地移建修築土城仍用灰土包築無庸改建甌城惟留壩
爲南山要路該廳亦係撫民同知衙署兵房倉庫監獄均
須有城捍衛該處山高水急屢被衝刷今擬請另擇形勝
要地建築甌城較舊時堡城規模收小不致糜費

公偕全保方維甸又奏言

臣等欽奉

上諭薛大烈奏官兵棚槽喂養馬匹是否可行著德楞額全保方
維甸詳悉妥商奏聞辦理等因

臣等伏查各營官兵馬匹
例應自行喂養所領乾銀春冬每日四分夏秋每日三分
遇有草料昂貴之時卽屬不敷雖馬兵祇養一匹而棚槽
鋤刀籠韁燈油各物皆不可缺需費較多不無賠墊且因

房屋窄小寄在他處喂養尤不能隨時照料馬匹難免疲瘦致該兵轉以有馬爲累殊於營伍無益若令棚槽喂養則數匹可共一槽數十匹可共一棚鋤刀祇需一把銍油等項皆可公用較之自行喂養所省不少若於秋收後草料價賤之時成總預買存貯所省尤多專派弁兵經管喂養隨時稽查馬匹亦易臙壯臣等公同籌議事屬可行應請將陝甘兩省將軍督撫提鎮各標協綠營馬匹均令棚槽官爲喂養似於兵丁馬匹均有裨益再西安滿營喂養馬匹與綠營馬兵情形相同請一併官爲喂養以昭體卹而示畫一均奏入

上從之

二十三日

公偕全保方維甸薛大烈奏言正月十四日接據西鄉營遊擊張俊陞任知縣李樞煥稟報十二日瓦石坪新兵聚集三十餘人搶去矛桿旗幟銀兩裹脅百餘人竄至大池壩屯紮並未戕官殺人燒燬兵房等情查瓦石坪係西鄉營分汛在定遠廳接連川省因係巴山老林通川之地設有守備一員千總一員外委二員兵三百名大半皆係新兵因何滋事未據切實查明或係該匪等尙未知綏定叛匪撲滅妄思響應亦未可定頃復據陝安道陳祁差探該

匪約有三百餘人由龍池場鍾家溝一路搶掠襲脅向細辛壩奔竄該處一帶地方與巴山老林相近北距漢中府一百七十八里南距四川亦祇一百數十里卽應派兵剿捕俾免蔓延前此綏定叛匪滋事時調派各兵均已停止現在_臣等會同商酌就近先調漢中各營及留防兵丁八百名_臣薛大烈卽日帶領起程並帶副將祝廷彪等先往剿辦仍檄總兵楊遇春挑帶甯陝兵一千名由捷徑趕往會剿惟該匪現竄之路處處接連川境恐賊匪聞知北面有兵又思南竄已飛咨勒保卽令太平協副將羅思舉迎來截擊現在漢中城內官兵多已派出城守未免空虛_臣

等札行漢南附近各營派兵七百名軍標兵五百名前來
以資防禦並預備接濟策應之用儻或稍有蔓延再調前
備之固原官兵相機進剿

諭曰德楞泰等奏接據西鄉縣文武稟報十二日二更時瓦石坪
汛新兵聚眾三十餘人搶去矛桿旗幟銀兩裹脅百餘人竄至
大池壩屯紮並未戕官殺人亦未燒燬兵房復據陝安道陳祁
探稟該匪約有三百餘人一路搶掠裹脅向細辛壩奔竄等語
此項新兵因何起事摺內尙未據切實查明旣云聚眾多人將
矛桿旗幟銀兩大肆搶劫是業已糾眾倡亂何以稱並未戕官
殺人該處所設守備一員千總一員外委二員被時均在何處

該汛兵丁共有三百名除滋事三十餘人之外其餘二百六十餘人是否尙知守法何以該官兵等不行剿捕該匪沿途裹脅有三百餘人向細辛壩奔竄究欲竄往何處其爲首者係屬何人前日甫有綏定新兵滋事之案辦理完竣而刻下又有此案看來各處新兵均未免因德楞泰辦理甯陝一案失之寬縱以致紛紛效尤不可不示懲創以昭炯戒現在該匪等所竄地方與巴山老林相近若不及早殲淨稍致蔓延辦理恐又費手摺內稱薛大烈楊遇春已先後帶兵一千八百名分投會剿猶恐兵力稍單辦理延緩德楞泰自當卽行挑帶勁兵親往督辦此旨到後著全保方維甸仍駐漢中辦理地方事件及查辦方柴

關潰兵之案德楞泰迅卽帶兵前往勿再遲逾伊於甯陝一案
辦理失當惟當勉贖前愆此次帶兵到時不但不可存招撫謬
見或賊匪畏懼乞降亦不可率予寬宥當將首夥各犯悉數殲
擒大申國憲方不致再有蠢動尤不可任逃逸山內致稽時日
至該處旣接連川境賊匪等聞知北面有兵或思南竄是川境
防堵事宜亦關緊要勒保現在綏定查辦該處叛案未能親至
邊界著卽迅派得力將領如桂涵羅思舉等挑帶官兵速赴川
陝邊界地方迎頭會剿以期兩面合擊剋日辦淨不致逃竄漏
網是爲至要仍著德楞泰等先將滋事緣由查明速奏

二十六日

公偕全保方維甸奏言竊瓦石坪新兵滋事臣等商同派兵截勦去後茲於十九日未刻據副將祝廷彪稟報賊匪由油坊坪一帶奔竄祝廷彪帶領前隊兵丁覓路抄過賊前適太平協副將羅思舉都司謝成貴等聞賊竄近亦卽不分畛域同時趕到十七日該協等合兵一處迎至大池壩地方賊匪蜂擁抗拒祝廷彪羅思舉親帶官兵從山梁併力壓下槍箭齊發攪殺甚久將首逆偽總元帥周士貴扎斃賊匪紛紛潰亂我兵爭先趕殺共殺賊一百六十餘名生擒八十四名並將首逆偽元帥趙文賢賊目謝文明張貴劉士貴拏獲奪獲騾馬旗幟鳥槍刀矛甚多餘匪二

百餘名竄入巴山老林該處冰雪甚大現在跟蹤趕緊剿捕等情又接據總兵楊遇春稟報十八日至峽石地方拏獲打散僞先鋒雷陞附和遊匪滕魁侯貴訊問打仗情形與祝廷彪所稟無異並供稱周士貴是僞總元帥趙文賢是僞元帥屬實伏查殘匪竄入巴山均已膽落現在薛大烈楊遇春兩路官兵已可到彼合兵剿捕即可就地殲除此次臨陣生擒之賊除將首逆賊目並楊遇春所獲賊目一名提解前來訊究起事根由再行懲辦梟示外其餘賊匪均卽正法

公偕全保方維甸又奏言近又據華陽營參將何占龍稟

獲並未投誠先行逃散之甯陝叛匪閔元瑞梅紅二名又甯陝中營遊擊黃瑞拏獲換防起程時脫逃之叛匪張元友一名解送前來臣等會同訊明卽行正法又拏到辭伍遞籍之蔣習元陳清二名卽遵

旨發遣黑龍江給兵丁爲奴尙有未獲之脫逃叛匪六名辭伍叛匪六名迅行嚴拏其已獲之犯卽行停緝

諭曰德楞泰等奏截剿瓦石坪叛匪殲擒首逆夥匪多名覽奏欣慰此次瓦石坪叛匪滋事裹脅匪衆五百餘名馬賊數十名往來搶掠甚爲可恨經副將祝廷彪羅思舉帶兵同時趕到會合一處迎至大池壩地方奮力剿捕殲斃首逆僞總元帥周士貴

擒獲首逆僞元帥趙文賢賊目謝文明張貴劉士貴共計殺賊一百六十餘名生擒八十餘名奪獲騾馬器械甚多餘匪二百餘名均已膽落奔竄所辦甚屬可嘉祝廷彪羅思舉著加恩交部議敘此時薛大烈楊遇春兩路官兵已早趕到所賸敗竄餘匪不難一鼓殄除著卽責成薛大烈楊遇春羅思舉祝廷彪等四人上緊勦捕悉數殲除勿使一名漏網該匪等竄入巴山老林該處冰雪甚大薛大烈等祇須於巴山老林察探該匪出沒必由之路嚴密圍堵使其無路逃生自必束手就斃轉不必專事追捕墮其牽綴奸計致疲兵力也所獲賊首賊目著德楞泰等細心研鞫詳訊起事根由務得確情具奏其僞總元帥周士

貴業被扎斃僞元帥趙文賢亦被擒縛現在餘匪二百餘名中
是否尚有僞元帥僞先鋒在內所稱馬賊數十人該匪等所騎
之馬何以多至數十是否搶掠本營馬匹抑係劫自民間並著
訊問明確爲要

二月初一日

公偕全保方維甸薛大烈奏言官兵趕剿瓦石坪叛匪於
十七日在大池壩大獲勝仗後該匪竄入巴山老林臣等
飛飭各路官兵分路入林搜捕不予以暇並飛飭瓦石坪
守備張傑查明叛匪姓名數目以憑核對二十日臣薛大
烈帶同副將祝廷彪已革副都統蘇勒芳阿等由倒洞壩

前進總兵楊遇春帶同遊擊張啟鼐等由高橋河前進副將羅思舉遊擊張俊都司呂天俸等由梨樹壩前進老林中道路險窄不能乘騎將領及漢滿各兵不避艱險悉皆步行攀陟探得賊匪由小濠壩蒿枝壩深入老林至燕子巖楊坪一帶潛匿臣薛大烈同蘇勒芳阿進兵梨子坪另派祝廷彪進至油盤堽楊遇春等進兵大坪羅思舉進兵涼橋另派張俊等進至鸚哥嶺數路圍截賊匪不能遠竄二十一日各路齊進遇有逃出之賊卽行截殺隨剿隨進二十二日官兵至陽坪圍剿奮勇直前剿殺叛匪十數名賊黨紛紛潰敗賊首韓金堂等見大兵雲集逃竄路窮喊

稱饒命棄械跪地

臣

薛大烈同楊遇春當將首逆偽總帥

韓金堂偽元帥陳紹禮何魁賊目偽總兵李加貴楊興德
五名綑縛其首逆偽總帥周士貴一名緣十七日打仗時
該匪前胸額顱受傷甚重倒地未死此次亦一併搜獲並
獲偽先鋒黃占隴叛匪李洪玉等二十六名連十七日打
仗羅思舉擒獲之偽元帥趙文賢叛匪謝貴等七名瓦石
坪兵丁擒獲之偽先鋒楊桂等五名甯陝兵丁擒獲之偽
先鋒雷陞卽雷洪陞一名殲斃三名共叛匪四十八名全
數殲獲與張傑開報名數相符並無一名漏網其餘賊夥
殲斃一百六十餘名羅思舉祝廷彪拏獲七十七名薛大

烈等又截殺三十餘名拏獲一百九十六名除業經殲斃
賊匪及此內被裹難民幼孩李應祥等訊明釋放不計外
現將游匪一百十八名細縛解送臣等查此次瓦石坪叛
匪膽敢謀逆滋事焚燒民房搶掠姦淫無惡不作實屬罪
不容誅茲仰賴

聖主天威將士奮勇軍聲大振數日之內卽得痛剿甫及旬月首
夥全擒地方肅清居民安業並使新兵震懾反側潛消實
深慶幸之至一俟各犯解到嚴訊起事確情卽將首逆凌
遲處死賊目叛匪及投往賊營游匪盡行正法服役匪徒
發遣爲奴以示懲儆除分別核辦續行開單具奏外現在

卷之三
三
派員確查難民妥爲撫卹並查明出力人員另行核實保奏

諭曰德楞泰等奏官兵圍剿瓦石坪叛匪首夥全擒盡數撲滅緣由覽奏實深欣慰此次陝省瓦石坪叛匪滋事經官兵痛加殲戮餘匪二百餘人竄入巴山老林藏匿延喘薛大烈楊遇春祝廷彪羅思舉張俊蘇勒芳阿督兵一路進剿擒獲偽總帥偽元帥首夥多名計叛匪四十八人全數殲獲並無一名漏網所辦可嘉本日正值朕宮中祀神之期午間卽據遞到德楞泰等六百里奏報吉事有祥以手加額特發去

神糕一盤賞給德楞泰全保方維甸薛大烈分賞用昭渥眷並賞給薛大烈白玉喜字搬指一箇黃辯大荷包小荷包二箇除副將祝廷彪羅思舉前已降旨加恩交部議敘外薛大烈楊遇春均著加恩交部議敘至遊擊張俊勦捕叛匪隨同出力自應一體仰邀甄敘但此次叛匪是否有張俊所管營兵在內有無激變情事著德楞泰等查核明確如該匪等起事實與該遊擊無涉亦並非伊所轄卽應奏明候朕施恩儻有該管營兵在內則該遊擊此次奮勇出力功罪亦可相抵若竟係該遊擊激變不惟不應加之獎勵並當示以懲創德楞泰等惟當秉公查詢據實具奏以憑核辦至蘇勒芳阿雖亦隨同帶兵勦賊但伊從前

方柴關潰兵一案尙未據德楞泰等查核明確應俟定擬具奏
到日再降諭旨所有此次打仗官兵著德楞泰等查明實在奮
勇出力者加恩賞給一月錢糧其餘隨同出力者賞給半月錢
糧至前次川省勦捕綏定叛匪一案辦理亦甚迅速桂涵所帶
兵丁五十名亦著加恩賞給一月錢糧其餘在事之團練鄉勇
並著勒保查明實在出力者加恩賞給一月錢糧隨同出力者
賞給半月錢糧以示鼓勵其陣亡四川新兵周全一名陝西新
兵張榮馬有貴二名俱著加等照外委例賜卹至摺內稱賊首
韓金堂等見大兵雲集逃竄路窮喊稱饒命棄械跪地等語與
川省綏定叛匪所供設或官兵追勦緊急可冀投首免死之語

情詞如出一轍可見該匪等固孽由自作亦總因甯陝叛匪滋事德楞泰輕率受降並未懾以軍威遂爾心存玩視相率效尤現在所獲各犯據德楞泰等摺內稱擬將首逆凌遲賊目叛匪及投往賊營游匪盡行正法等語所見甚是自應如此辦理並著德楞泰勒保等曉諭川陝各營新兵嗣後務當安分守法若有倡亂滋事者國憲具在卽力竭投誠亦斷難幸免誅戮況新兵等旣入伍食糧均當爲國家出力自非心懷反側皆得共享昇平朕一視同仁伊等更無容妄生疑慮近日如桂涵羅思舉皆係由鄉勇出身因效力戎行屢著勞績不次超擢用至專閫大員其次如羅貴亦係新兵因勦捕綏定叛匪出力破格殊施

錫予勇號仍加等擢用至如此次陣亡之川陝新兵亦俱加等
賜卹若自作不靖卽分別凌遲正法不能稍爲寬貸蓋急公效
命則仰沐恩施蒙旃奕世作奸犯科則身遭誅殛妻孥不保禍
福惟其自取耳仍著德楞泰等嚴訊現獲各犯查明起事根由
該匪等此次並未戕害地方官吏諒非激變究竟因何起衅務
得確情據實具奏

恭錄

御製詩

新兵三十韻

教匪幸盡除營伍歸汎地鄉勇實繁多過半皆收類有家樂生

還無籍難安置羈縻暫分防從權非善議

平定川陝楚三省教匪藏功完善各省派

調官兵皆陸續凱旋撤歸伍至鄉勇一項有在本籍地方團集堡寨衛護田廬者大率皆身家贍足之人事定後各安生業共樂昇平其隨征鄉勇係軍營隨時雇募者此輩多係素無恆產驚驚不馴之徒平時作奸犯科原不能保其必無及至廵募隨營衝鋒陷銳出力為多當大功告成之際預飭各該督撫查明欲歸原籍者給費遣送各還鄉土其無籍可歸者不得量為安置惟是經略額爾登保因議增設新兵卽以此項鄉勇充補俾得餽項以資養贍兼冀其矚習營規用示鈐束實一時權宜之計非經久行軍紀律先獎進懲退避法令若不伸孰肯輕營無弊之法也

試陝安率往降姑息綱紀棄誅逃倣其餘投裔禦魍魎

上年秋間甯陝

管新兵陳達順陳先倫向貴等糾眾倡亂襲脅多人拒捕戕官特命德楞額泰扎克塔爾溫春薛大烈等前往督同該省領將上緊剿辦調集陝甘川省官兵西安駐防滿兵並盛京吉林黑龍江墨爾根學團官兵先後馳往原望一鼓殲除中聞肅典大示懲創德楞額泰等到彼先後派官兵四路擊剿頗有斬獲及至力柴關與賊接仗後隊伏賊起至為敗散多官兵被賊衝擊情形

退敗而賊黨蒲大芳王文龍等率眾趕至軍前投棄兵械跪哭乞降經楊遇春等諭令將賊眾撤退並獻出首逆再行定議蒲大芳等立將陳達順等三人縛獻並麾退賊眾擒斬不願投順者數人遂稟知德楞泰准令受降此大誤也十月初間德楞泰等報至朕卽諭令德楞泰等將該叛賊按律分別定罪原欲俟奏到時核其情節稍有可原者貸以一死已屬格外施仁乃德楞泰尚未接奉諭旨輒將現存叛賊二百四十餘名仍歸原營入伍姑息養奸實從來無此辦賊之法節經降旨嚴飭令其另行定議並將辦理錯謬諸大員分別黜懲嗣經調任總督全保巡撫方維甸等奏擬借新疆與防爲名將各該處未動新兵與降賊二百二十餘人分起調出一體搭配分派將弁管帶出關俟到彼後將降賊分給各回城回子伯克爲奴其著名之犯俟行至中途相機擊解定擬斬絞並稱現在新兵及降賊均各情願換防等語在全保等之意係欲從權辦理但既以換防爲名分起調往新疆及到後又復傳旨分別發遣是仍設計誘往不足以及以中國法而示嚴懲爰特降恩旨令全保等將該犯等竟作爲換防兵丁配搭陳兵分起前往俟到戍後將此等降賊永勿令其換回以示屏諸遠方之意其著名各犯亦無庸再分等差此實因德楞泰等辦理降匪業已錯謬於前而朕保護良民之苦心不得已如此完結非正辦也嗣據德楞泰等奏防戍新兵

及降匪蒲大芳王文龍等俱已全數起程內有不願換防及推
病脫逃之苟文典等於拏獲時卽行正法其歸伍後脫逃者飭
各該督撫嚴拏務獲勿令漏網至方柴關敗退之兵旣飭勒保
全保等查明嚴辦並將帶兵大員如田朝貴游棟雲蘇勒芳阿
等核其情節分別
定擬用肅軍紀焉
綏定亂旣滋越城竄守備兵集團練迫一戰

機槍墜罰罪賞有功免賦除民累

本年正月初十日據德楞泰等奏川省綏定府城新兵有

滋事之信正在降旨飭諭於次日旋據奏到接據川省文武稟
報綏定叛匪業經副將桂涵等帶領兵勇於麻柳場地方剿殺
全勝將首逆孔傳仕王得先並劉姓等擒獲其餘殺斃生擒者
甚眾文武官員俱未被害等語續又據勒保馳奏除首逆生擒
外其餘旗手及附和匪徒亦全數殲獲並無一名倖免因降旨
將奮勇出力之桂涵加賞總兵銜仍交部從優議敘並賞給巴
圖魯名號其道員嚴士鉉同知王世燾調撥團勇地期制勝均
著交部議敘至達縣知縣余永甯東鄉縣知縣楊世鼐新甯縣
知縣劉毓璜均因練勇殺賊或賞戴花翎或給予陞銜補用卽
徵員末秩亦量予甄錄而在事兵弁等亦各量予改補其尤爲
出力之新兵羅貴卽以千總超補並賞給巴圖魯名號以示優
獎至守備王國雄先因扣留兵餉激生事端旋即越城遁匿卽

令於該處正法用昭炯戒所有綏定城內及麻柳場居民被賊焚燒者飭令該督查明將本年應徵錢糧悉予寬免並酌賞修理房屋之費給賑川境甫收甯陝邊復恣肆揭竿瓦石坪嘯聚三月俾無失所

山林遂兩省師夾攻奮威固原帥首逆盡生擒殲蕪妖崇

綏定之事甫竣又據德楞泰等奏陝省邊境瓦石坪地方復有新兵滋事旋據奏經副將祝廷彪會同川省副將羅思舉合兵剿殺已將首逆周士貴殲斃並擒獲賊目趙文興等共計殲擒賊匪二百餘名其餘匪二百餘人竄入巴山老林當經降旨責成固原提督薛大烈甯陝總兵楊遇春督同祝廷彪羅思舉上緊圍捕務令就地殲擒二月初一日據德楞泰等奏薛大烈楊遇春等督兵五路進剿將首夥各犯盡數撲滅辦理實爲迅速除副將祝廷彪羅思舉先行交部議敘外薛大烈楊遇春二人亦一體加恩敘敘並著德楞泰等將打仗出力官兵分別賞給一月半月錢糧其前次川省剿捕綏定叛匪之兵勇等亦分別賞給錢糧有差用示鼓勵未可尙寬柔玩易如兒戲火烈孰敢攖水懦思益熾衆正紀律嚴知方明大義半載三叛亡蕩平威

天賜守法遵

考猷詳紀新兵事

國家設兵衛民可百年不用不可一日不備是

敵致果所向無前大易所謂師出以律者此也我朝自開
國以來八旗勁旅英銳之風為前代所未有列聖相承皆
以經武為亟我皇考神謨廣運睿略周詳曾頒發行
軍紀律於有進無退之旨訓諭諄諄誠以敵愾同仇義無
返顧必軍令嚴明而後眾志成城如山岳之不可動斯戰勝攻
取無逗撓之虞而保全者眾此武功十全所由赫赫隆隆茂
卓越千古也予祇承丕緒親政之初正值勦辦三省邪匪
籌機決策亦惟申明賞罰不少寬假用能淨掃賊氛奠安黎庶
此次新兵偶有蠢動德榜泰於甯陝叛賊冒昧受降以致辦理
未能妥協節經嚴切訓誡並於方柴關退敗一事嚴實查辦以
飭戎行而綏定瓦石坪兩處新兵滋事遂相繼珍平不致稍稽
時日此實仰賴天慈垂佑於半載之內俾三叛賊不旋踵
而定而予之恪遵考志以申
倣武備者實未敢少有懈弛云

十六日

公偕全保方維甸薛大烈奏言竊官兵在陽坪老林圍剿
叛匪全數擒獲前經奏明俟解到時分別審辦查叛匪共
四十八名除殲斃何貴等三名外茲解到陝省官兵擒獲
叛匪周士貴等三十八名及遊匪覃貴等一百四十四名
又乘機搶銀並被脅兵丁謝文明劉士貴二名川省解到
所獲叛匪趙文賢等七名遊匪沈正興等六十七名共計
解到賊匪二百五十八名臣等連日悉心研審緣瓦石坪
營汛係西鄉遊擊管轄額設兵丁二百九十一名皆由隨
征鄉勇入伍除去冬新疆換防兵三十名又出差及塘汛
兵三十一名外實存營兵二百三十名首逆周士貴充當

馬兵素性驚駭與馬兵韓金堂陳紹禮趙文賢何貴等屢次飲博同惡相濟均屬不安本分向來年底例借接濟銀兩馬兵每名應借銀四兩於次年每季放餉時扣銀一兩四季全歸原款嘉慶十年十二月二十四日支發接濟銀兩次年春季餉銀亦於是日支發守備張傑以同日支放卽行坐扣一兩實祇借給銀三兩於夏秋冬三季扣還報明有案十一年十二月二十一日經護理守備事千總蒲明支放接濟銀兩每馬兵一名借給四兩二十六日支放次年春餉卽照例扣還銀一兩周士貴以十年祇領接濟三兩恐係守備短發隨向蒲明稟問經該弁告以十年所

領接濟因與眷餉同放是以坐扣一兩祇放三兩次年扣過三季亦祇扣還三兩並未多扣周士貴總以雖未短發但歲暮時多借一兩卽當得一兩之用今先坐扣心懷不服正月初八日該犯邀同韓金堂陳紹禮趙文賢何貴王三元等會合飲酒俱入醉鄉說及此事何貴聲稱當兵徒受拘束不如約人搶掠衆人隨口附和適有守備跟役胡三達路過窗外聽聞密向守備張傑告知張傑卽於正月初九日傳到韓金堂陳紹禮等查訊韓金堂等供明實係一時酒醉糊塗亂說並無謀反情事張傑大加呵斥聲言欲稟明西鄉遊擊查究其實藉以恐嚇並未具稟該匪卽

彼此竊議一經具稟必干重罪正月十一日張傑適差兵丁馬有貴赴西鄉公幹王三元探知以爲必係稟知此事向周士貴韓金堂等告知該犯等隨於是日二更邀約夥黨聲言本官業已差人稟報本營兵丁全行造反你們不反亦死不如大家及早逃生聽糾者共有四十餘名齊集街上其餘兵丁均不肯聽從入夥守備張傑及千總蒲明聞知親至街上曉諭隨有匪徒張貴滕魁等數十人附和開關喝止不住張傑當向叛匪面言不如先將我殺害再行造反該匪等聲稱祇圖逃命不敢殺官亦不敢在此殺人放火張傑蒲明卽與外委魏陞牛正爵等分投傳喚未

經從賊之兵查拏叛匪時已半夜不能一呼卽至而周士貴等已擁入營庫搶去軍械並搶去餉銀三百八十一兩零營馬七匹立時竄逸迨傳齊各兵已交四更千總蒲明外委魏陞卽欲督率趕拏張傑以夜間無處跟蹤至十二日天明後率同蒲明魏陞牛正爵將存營兵一百七十九名全行帶出追拏賊去已遠未經趕上該匪叛出後查點匪衆起首滋事並附和兵丁四十八名附和匪徒三十六名此外有兵丁劉士貴李陞二名原未附和被周士貴逼脅同行又有謝文明一名原未入夥乘亂搶得餉銀二錠旋即逃出未經同行十二日賊匪竄至大池壩衆議周士

貴爲總元帥韓金堂爲副總元帥趙文賢陳紹禮何魁三人爲元帥楊興德李加貴爲總兵郝國清汪文禮蘇貴項正剛黃占隴符甯高張洪玉李清方正興李洪玉柳明春謝貴何貴張建雷洪陞十五名爲先鋒高文桂王三元古文學爲旗手三十四十五等曰由龍池場鍾家溝雒家壩細辛壩一帶奔竄焚掠裏脅破洞殺人搶奪騾馬姦淫婦女沿途有張有得覃貴帶領邊界游匪入夥復繞道山窩壩菩提河折竄東南並焚燒西大池壩塘房十間十六日繞回瓦石坪意欲勾結兵丁因官兵全已帶出無從與脅祇將民房焚燒延燒守備署堂三間隨至簡池壩邊境

探聞前有川兵不敢前進旋又折回十七日在大池壩地方經官兵剿殺後餘匪奔竄巴山老林二十二日在陽坪地方官兵四面截住賊匪無路逃生全數擒獲茲將前獲續獲賊匪一併解到嚴加刑訊據供前情不諱亦並無綏定匪徒前來勾結及營員等剋扣兵餉以致激變情事其餘入夥遊匪_臣等一一提審令其與叛匪等當面質對供亦相同查此案除何貴胡昌祿張大鳴三名業經臨陣殲斃外現在獲解叛匪四十五名內周士貴僞稱總元帥韓金堂僞稱副總元帥趙文賢陳紹禮何魁僞稱元帥均係起意首逆應將該五犯一併凌遲處死傳首滋事地方梟

示仍查明家屬緣坐財產入官賊目楊興德李加貴等十六名僞稱先鋒旗手叛匪王三元等二十四名俱係兵丁聽糾滋擾至邊界附和游匪除臨陣殲斃一百九十餘名外現在獲解匪夥譚貴等一百六十六名訊係聞風投往各夥厥罪維均兵丁謝文明雖未入夥但乘機搶掠餉銀亦屬法無可貸俱應卽行正法梟示以申

國憲以上共計二百零七犯臣等於審明後卽飭委陝安道陳祁漢中協副將祝廷彪並派文武官弁押赴市曹分別凌遲處斬訖城廂內外萬眾環觀無不同聲稱快賀明良等二十八名被脅同行僅止煮飯喂馬背負行李並未挾

掠殺人但既爲匪徒服役卽非善類兵丁劉士貴係屬被
逼同行於十七日逃出雖非甘心從賊但身充行伍究非
民人可比未便竟置不議應與賀明良等均發往黑龍江
給披甲人爲奴卽行起解民人陳紀黨等十七名實係甫
經被裹旋卽逃出各有親屬保認交地方官遞回省釋未
獲之兵丁李陞通緝務獲究辦謹將拏獲數目各犯姓名
籍貫分繕清單恭呈

御覽至守備張傑訊明並未苦累兵丁剋扣糧餉當叛匪滋事之
初該員親身曉諭調集營兵亦未畏葸逃匿惟平日不能
約束新兵及兵丁聚飲妄言又不能立行拏究迨叛匪滋

事竄出後猶不卽時趕捕待至天明始行往追實屬怠忽無能未便因其隨同剿賊稍從末減應請

旨將張傑革職發往伊犁充當苦差西鄉營遊擊張俊駐劄縣城距瓦石坪二百七十餘里並不同城此番事起倉猝亦非豫謀爲逆該員一聞稟報卽行帶兵趕拏打仗亦多殲獲惟瓦石坪係該遊擊所轄實非尋常失察可比應請

旨將張俊以都司降補千總蒲明外委魏陞亦有約束不嚴之咎但該弁等原欲帶兵連夜趕拏張傑不允尙非該弁等怠玩打仗時蒲明擒賊李開明等三名殺賊四名魏陞擒賊王觀國等三名功過尙可相抵應將蒲明責處拔去藍翎

仍行革職留任魏陞重責四十棍以觀後效額外委牛
正爵打仗並未獲賊應卽斥革陝安鎮總兵王兆夢接據
稟報卽日帶兵前來臣等恐賊匪竄渡江北札令沿江一
帶堵截是以未至軍營該鎮係管轄總兵例有失察處分
應請

旨將王兆夢交部議處臣全保臣薛大烈於上年十一月十二月
先後到任卽難辭咎請

旨一併交部議處

公偕全保方維甸薛大烈又奏言竊照瓦石坪叛匪滋事
官兵分路勦捕西鄉營遊擊張俊漁渡營都司呂天俸留

壩營都司顧應全聞信俱卽各帶兵立往趕剿副將祝廷彪奉派後卽帶兵抄赴賊前五石坪守備張傑亦帶本汛兵趕上匪蹤適川省副將羅思舉都司謝成貴帶兵趕到合力剿殺殲獲甚多餘匪始窮蹙潛入老林臣薛大烈楊遇春復督率游棟雲蘇勒芳阿羅思舉祝廷彪遊擊張啟釐張俊都司謝成貴呂天俸朱福壽楊殿甲等各路官兵四面兜圍仍挑趯健官兵入林搜剿委前鋒校佛成前鋒綳僧額千總唐璣劉倖柱劉太詹玉彬外委王國輔鄭文泰馬兵白玉魁攀投險阻趕剿賊匪尤爲出力得於數日之內全數殲擒並無漏網地方肅清各員弁實屬著有微

勞至在事地方文員辦通軍糧差探賊情團勇結寨均自
上年七月甯陝叛匪滋事時卽已調至軍營近復因綏定
之事派往邊界本年正月剿辦瓦石坪叛匪亦曾派往各
路軍營始終奮勉又臣德楞泰奏帶來陝之主事趙麟等
辦理文案及善後各事宜均能實力實心不辭勞瘁又城
固縣候選知縣樊玉軸上年因甯陝叛匪滋擾自雇壯丁
守城並捐辦灰甎修補城垣尙義急公嗣復隨臣德楞泰
軍營差委實能奮勉臣等公同查核謹擇其最爲出力者
同兩次打仗奮勇各員弁開具清單進

呈恭懇

皇上施恩以示鼓勵其隨同羅思舉一路出力弁兵練勇應歸勒保就近查明分別奏請獎勵再詹玉彬係銅鼓營千總曾在軍營出力此次隨同臣薛大烈勦辦叛匪不辭勞瘁且於陝西南山邊界情形最爲熟悉可否留於陝省以守備補用之處出自

皇上天恩

公偕全保方維甸薛大烈又奏言查陝甘各營每遇青黃不接米糧昂貴之時及歲底諸通盈集之際皆借餉銀接濟仍於次年分作四季扣還自乾隆十二年

奏准後歷經照辦並無拖欠甯陝中左城守西江口華陽五

營於嘉慶十年冬底經該營詳准前任總督倭什布借領一季餉銀九千二百五十二兩各營於歲暮先借給兵丁度歲銀五千六百零三兩中左二營尙存銀一千九百六十兩華陽營尙存銀一千二百六十九兩華陽分出之厚畛子汛尙存銀四百二十兩以備責黃不接隨時接濟之用叛匪滋事時將中左兩營華陽營貯庫銀兩搶掠無存惟厚畛子地方賊蹤未至未被搶掠茲據總兵楊遇春查明具報前來_臣等查此項借給兵丁度歲銀兩內除司庫已於上年夏季扣過銀二千三百一十三兩外尙有未扣銀三千二百九十兩例應照數扣還惟是各營兵丁多換

防遣戍之人且現在裁汰兵額曠缺已多無從按名查扣
卽存營各兵屢遭蹂躪情形尤爲可憫相應據實奏明請
旨至存庫被搶銀三千二百二十九兩兵丁本未借領經楊遇春
查明實係被賊搶掠屬實但究係該營將領防範不嚴所
致應請

旨於正署總兵參將遊擊名下追賠歸款再查十年秋苗賑濟案
內有賸存包穀二千五百七十餘石於十一年七月

奏明借給甯陝各營兵丁添補食用又華陽營於十一年七
月借給兵丁存貯營地稻穀二百三十五石五斗四升均
應扣還現在兵多空缺亦難著追相應一併奏明請

公偕全保方維甸薛大烈又奏言竊照陝省山內迭散游
匪恐有逗留生事以及賭博匪徒擾害居民均應查拏嚴
辦臣等專派地方文武分投查緝茲據參將李英多拏獲
叛匪張雲一名副將祝廷彪拏獲叛匪黃有寬一名又拏
獲搶掠匪犯汪正海陳文潮張開貴賭犯馬思貴曹登楷
袁天杰等六名華陽營參將何占鼐拏獲匪徒余相一名
臣等逐一研訊張雲黃有寬二犯均係從賊搶掠殺人未
候遣散先行逃走之犯應卽正法余相先充鄉勇現在寶
雞山內開設飯店曾窩留已經正法之叛匪楊滿王才二

人認爲義子應照容留外省流棍勾引來歷不明之人例發近邊充軍至配所杖一百折責安置汪正海陳文潮張開貴三犯俱屢經搶奪過路人財物應照川省匪徒在野攔搶止二三人犯該徒罪以上不分首從例實發煙瘴充軍照例刺字至配所杖一百折責安置馬思貴在空廟聚賭抽頭曹登楷袁天杰前往賭博均屬不法馬思貴應照杖一百徒三年至配所折責安置曹登楷袁天杰均枷杖遞籍審明後均卽分別辦理再歸伍脫逃降匪內現又拏獲聶富一名_臣等會同訊明實係聞知換防輒行脫逃當卽正法又傳到辭伍遞籍降匪孫仲盛寇得二名遵

旨發往黑龍江兵丁爲奴現在未獲之脫逃辭伍降匪共祇九名
仍嚴行查緝務獲辦理

公偕全保方維甸薛大烈又奏言竊

臣

等欽奉

諭旨方柴關潰兵一案昨據德楞泰等已查明大概情形係屬先
勝後敗尙非遇賊卽退著卽會同提質明確奏明懲辦等
因茲

臣

等復向游棟雲蘇勒芳阿訊問與前奏情形無異

並傳現在漢中之西安馬隊固原漢中河州兵丁隔別研
訊該兵等供稱九月十八日前敵接仗實係陝甘四川各
兵同在一處各兵同時退下滿營綠營馬隊官兵俱在山
下亦卽退至小橋抵禦如果能指出先潰兵丁此案有人

當罪卽與我等無涉豈肯代人受過等語復向鳳安趙洪周訊以從前爾等俱稱川兵先退何以不能指實據鳳安稱是日山腿退回各兵內我因見有川北字樣旗幟是以指稱川北至其餘旗幟我實不能認識據趙洪周稱我因退回官兵內有四川把總高耀馬兵冉貴二人是向來認識所以指說川兵至其餘官兵我皆不熟彼時誰先誰後實不能指定等語臣等復派知州雒昂帶同滿漢官兵赴方柴關踏勘地勢據雒昂查稟與節次訊奏情形符合總由數隊兵丁乘勝追賊已屬攙雜不齊追後賊匪悉數抗拒分作數路拚命攻撲各兵因傷亡人多同時退下被賊

卷之三十一
截作數處各不相顧加以霧雨瀰漫辨視不清究竟何人
先潰委不能指出姓名反覆究詰矢口不移臣等伏思兵
丁打仗未能全勝相率退回卽係鎮將等訓練不精約束
不嚴所致既不能查出首先退回之兵卽應罪坐將領除
蘇勒芳阿已經奉

旨革職川北鎮總兵田朝貴由勒保審辦外所有解任之河州總
兵游棟雲到任七月旋即出師本派在後路接應當官兵
被賊匪撲退該鎮尙能督兵趕緊拏營放槍轟擊但未能
抵住賊匪自有應得之咎應請

旨將游棟雲革去總兵留於陝甘以副將降補漢中副將祝廷彪

到任甫及三日卽出兵打仗彼時各兵退回係屬該協殿
後抵禦且此次瓦石坪叛匪滋事該協會同羅思舉帶兵
星夜趕至該處痛剿獲勝實屬超眾出力相應據實聲明
請

旨核辦

諭曰此次瓦石坪叛匪不守營規心疑該守備張傑短發接濟銀
兩醉後出言無狀膽敢藉詞恐嚇眾兵糾約滋事焚搶抗拒實
爲罪大惡極除臨陣殲斃各犯外現獲之周士貴等二百七犯
業經德楞泰等審明分別交遲處斬餘俱照議分別發落至守
備張傑於支接濟銀兩時因次年春季餉銀同口支發坐扣一

兩係例應扣還之款並非私自短發剋扣迨首逆周士貴等會聚飲酒聲言不如約人搶掠該守備聞知傳到呵斥欲行申稟查究亦係伊職分所當管束且該犯等邀約開關時張傑當向面言不如先將我殺害該匪等猶稱不敢殺官可見該備平素自無斂怨激變情事惟據稱該匪等搶庫竄逸時已四更千總蒲明外委魏陞卽欲督率趕拏張傑以夜間無處跟蹤俟天明始行追拏賊去已遠未經趕上其咎實在於此但該備續經隨同勦賊其並不卽時躡捕之處予以褫職已足示懲張傑著革職免其發往伊犁充當苦差千總蒲明外委魏陞雖有約束不嚴之咎但均能打仗擒賊功過尙足相抵蒲明著拔去藍翎仍

帶革職留任免其責處魏陞亦免其重責總督統轄營伍咎有
應得前次川省殺定叛匪滋事勒保在陝聞信馳往調度有方
迅速撲滅是以加恩免其議處全保於此次勦捕事宜祇係會
同辦理所有自請交部議處之處著加恩改爲察議薛大烈帶
兵圍捕出力前已降旨議敘著免其議處總兵王兆夢著交部
議處遊擊張俊著以都司降補

又

諭曰德楞泰等奏會同查明勦辦瓦石坪叛匪之出力文武員弁
懇恩鼓勵陝省瓦石坪匪徒滋事德楞泰等調集各營官兵分
派各員弁撲勦擒賊功迅速而在事各員辦運軍糧團勇結

奏亦俱不辭勞瘁奮勉急公宜加恩獎以示鼓勵

除太平協副將羅思舉城

口營都可謝成貴業經分別陞賞外其餘均各獎擢有差

加恩

又

諭曰甯陝中左城守西江口華陽五營借給兵丁度歲銀兩除扣過銀二千三百一十三兩外其未扣銀兩本應照例扣還但念各營兵丁多有換防遣戍之人且現在裁汰兵額曠缺已多卽存營各兵屢遭蹂躪情尤可憫所有未扣銀三千二百九十兩著加恩免其扣還至中左兩營及華陽營存庫被搶銀三千二百二十九兩據該將軍等稱該管將領防範不嚴應請在正署總兵參將遊擊名下追賠歸款等語甯陝叛兵滋擾所有該管

將領業經查明分別功罪或量予恩施或加之懲處此時若再將被賊搶掠銀兩責令分賠恐該將領等籍口代賠又私向兵丁剋扣致滋流弊所有此項被搶銀兩亦著加恩免其賠繳其借給甯陝各營兵丁包穀二千五百七十餘石借給華陽營稍穀二百三十五石五斗四升並著加恩一併免其扣還以示體卹

又

諭曰德楞泰等奏查訊方柴關打仗退回兵丁將約束不嚴之鎖將參奏請旨懲辦此次官兵在方柴關勦賊實係先勝後敗並非遇賊卽潰但臨敵退後官兵均有應得之罪德楞泰等查訊

情形與勒保前日所奏俱相符合此案川北兵丁昨因各營合隊不能確指先退之人已加恩免究其帶兵鎮將並各從寬議處所有陝省此次打仗退回兵丁亦著加恩免其查究至總兵游棟雲到任甫經七日卽帶兵剿賊當賊匪追撲官兵時該總兵趕緊拏營督率兵丁放槍轟擊尙無懼怯情事田朝貴任川北鎮較久平日疎於訓練前將伊革去提督銜巴圖魯名號留川北鎮總兵仍帶革職留任游棟雲與田朝貴過失相等在任日淺著加恩免其降調留河州鎮總兵仍帶革職留任以示懲儆副將祝廷彪到漢中協任甫經三日在方柴關打仗時殿後衝殺嗣剿除瓦石坪叛匪超眾出力現另旨加恩賞給巴圖魯

名號此案約束不嚴之咎竟予免議蘇勒芳阿係滿洲大員勦賊不能獲勝前已降旨革職念其打仗時曾受箭傷後隨同勦捕瓦石坪賊匪亦有微勞著加恩賞給藍翎侍衛作爲領隊大臣前往和闐換班朕申明軍紀權衡功罪一秉至公各營員應知感知奮平時訓練有方臨事克敵致果用副朕整飭戎行至意

十九日

公偕全保方維甸薛大烈奏言

臣等欽奉

諭旨飭令將兵丁等應扣款項共有若干迅速查明核辦等因伏查兵丁出征由營起程借領行裝銀一次到軍營後准其

借支衣履銀二次是爲例內如有多借卽係例外前次剿捕教匪日在深山老林奔馳跋涉嚴寒盛暑衣履穿破必須隨時添補且追賊緊急日行一百數十里無暇停留亦須隨地買食山內百物昂貴鹽糧實屬不敷此等情形迥非他處軍營可比又軍興已閱九年亦與從前征兵一二年凱旋三五月撤回者不同借支次數較多卽爲例外借項並非於例外供支他物所有兵借之項俱係將領等稟明帶兵大員出具鈐印各領在糧臺支領仍報明軍需局查核報銷時軍需局行查各該營俟本營覆到借領銀數相符然後在應領月餉內分別扣還有印領可據名冊可

憑糧員無從影射所有例內例外借項實係兵丁所領委
無絲毫浮冒去年六月內臣方維甸曾查明陝省兵丁借
領銀數將例內者咨明戶部奏蒙

皇上恩免十分之三各營兵丁同深欽感其例外借支銀兩前准
部議均令不分限期扣還並令自行清理不准咨部立案
是以未將例外借項咨部茲奉

諭旨飭將例內例外借支一併查明核辦行據藩司常明查明細
數開報前來臣等覆加查核謹將陝省西安滿營軍標三
營撫標二營提標五營提屬之陝境各營延綏陝安甯陝
三鎮標及所屬各營員兵丁節年借支例內例外銀數分

別已扣未扣截至上年十一月底止開列清單恭呈

御覽伏候

皇上訓示至十一年勦辦甯陝叛匪官兵借支行裝銀兩係屬酌量減借俟行查各原營覆到方行起扣是以未經列入合

併陳明

諭曰陝省官兵等從征有年借項累累上年方維甸查明例內應借各款咨部核辦時業經降旨免扣十分之三以示體卹此次該官兵等在甯陝及瓦石坪隨同勦捕叛匪迅速蒞功均屬出力所有陝省西安滿營軍標三營撫標二營提標五營提屬之陝境各營延綏陝安甯陝三鎮標及所屬各營歷年借支各款

無論例內例外著再加恩將兵丁借項寬免十分之三其官弁借項寬免十分之二俾伊等得項稍紓操防益加奮勉

同日公偕全保方維甸薛大烈又奏言竊查陝安鎮西鄉營係屬新添營分駐紮西鄉縣並分鍾家溝司工堰口等汛設有遊擊一員守備一員千總二員把總三員外委四員額外外委二員共馬步守兵七百名因瓦石坪地方接連巴山老林爲山內通川要路與川省竹峪關相對竹峪關設有守備是以於西鄉營汛內分出守備一員千總一員經制外委一員額外外委一員馬步兵二百九十一名移駐瓦石坪仍歸西鄉營遊擊管轄該處距西鄉縣城較

遠距定遠廳城較近且定遠城內之漁渡營係屬舊時營制本伍之兵皆係陳兵莫若將瓦石坪分汛改歸漁渡營管轄使之新陳相間方可稽查鈐制其西鄉營汛現在額設遊擊一員千總一員把總三員經制外委三員額外外委一員馬步兵四百零九名其地尙在定遠之內似可無需多兵且該營新兵較多應撥把總一員兵一百名歸入漁渡營祇移兵缺不移新兵遇有西鄉新兵出缺陸續於漁渡營陳兵子弟內挑補由地方官結報並將西鄉營遊擊改爲漁渡營遊擊移駐定遠兼轄瓦石坪分汛其漁渡營都司卽請改駐西鄉均照例換鑄關防以昭信守如此

一轉移間官員兵丁無庸增添衙署亦無庸另建而邊界要地陳兵較多新兵較少實於控制巡防均有裨益奏入上從之

二十二日

公偕全保方維甸薛大烈奏言現在南山漢南地方俱已

甯謐所有調派各兵及留防固原征兵俱卽撤回原營惟

查漢中係扼要之地此時軍務已竣

臣

德楞泰卽須赴川

查閱營伍

臣

全保方維甸亦於拜摺後均須回省辦事

臣

薛大烈自應在漢中略駐月餘再行赴任漢中存城兵數較少且多新兵茲當叛匪屢次滋事人心甫定之後自應

加以鎮撫擬將征兵內漢鳳略陽甯羌陽平四營陳兵共
六百名給予鹽糧暫留漢中以資彈壓俟過麥收之時撤
回原營至山內地方到處皆有游匪必應認真查緝臣等
曾於上年十二月內奏明派令山內營汛兵丁分撥查緝
茲於甯陝陝安漢中協營挑兵一千五百名搜緝匪徒各
兵應支分例未便仍給鹽糧應請照從前戶部議准本省
會哨兵丁之例每兵每日給鹽菜銀三分本色口糧一分
所有本色口糧卽於存貯軍糧內動支仍照向例每月以
二十日爲率不得滿月支給一半年後再行停止再上年
勦辦甯陝叛匪征兵借領行裝係照定例酌減應支鹽菜

係照剿兵分例支給在案嗣綏定匪徒滋事臣等奏調滿

營軍標官兵赴川剿賊當經查照定例在藩庫請領俸賞

並借領行裝行至中途撤回其餘各營征兵尙未起程並

未借領此次瓦石坪叛匪滋事臣等復奏派西安軍標官

兵因甫借行裝卽未經再借其固原兵丁起程時有借銀

三兩亦有二兩者漢南甯陝鎮並留防官兵各借銀三兩

較之例內應借行裝尙不及半此次賊事迅速軍標固原

各兵均於中途撤回其趕到軍營者係西安滿營兵三十

六名漢南各營兵七百名漢中協兵並漢中留防兵九百

名西鄉漁渡營兵一百五十名甯陝鎮兵一千名並羅思

卷三十三
三
舉所帶川兵四百名均在老林趕剿賊匪奮勇出力所有該兵等此次陝省借銀九千二百七十餘兩川省借銀一千二百兩可否免扣之處出自

聖主逾格鴻慈其未到軍營之西安滿營軍標固原各兵所借行裝未便一律請免但各兵從前借項尙多應懇

皇上天恩俟該兵等舊項扣完之後再行起扣以紓兵力

諭曰陝省南山漢南地方現在俱已甯謐漢中係扼要之區當此叛匪甫定之後不可不留兵彈壓著照所請即將征兵內漢鳳略陽甯羌陽平四營陳兵六百名給予鹽糧暫留漢中派薛大烈在彼駐劄統領俟過麥收之時察看情形再行酌撤至山內

游匪尙多德楞泰等請挑兵一千五百名分投搜緝自應如此辦理應支分例著准照本省會哨所有兵丁之例支給俟緝捕游匪事竣卽可酌量停止

又

諭曰瓦石坪叛匪滋事經德楞泰等調派西安漢南漢中西鄉甯陝滿漢營兵並羅思舉帶領川兵會合剿捕迅速蒧功實屬奮勇出力所有該兵等陝省借領銀九千二百七十餘兩川省借領銀一千二百兩均著加恩免其坐扣其業經征調未到軍營之西安滿營軍標固原各兵所借行裝銀兩並著加恩俟該兵等舊項扣完之後再行起扣以紓兵力

五月十七日

公偕勒保奏言臣等欽奉

諭旨飭令將兵丁應扣款項共有若干迅速查核卽開單覆奏等

因茲臣德楞泰因查閱行伍到川同臣勒保悉心查核官

兵等例內借支者有俸賞行裝及借支行裝並糧臺借支

三款統計平苗及協剿湖北教匪並剿辦達州教匪三案

除已扣外尚有借支未扣銀十七萬三千九百餘兩臣勒

保曾於上年正月內開單奏

聞在案此外尚有上年派赴臺灣甯陝等案內借支銀八萬七千

五百餘兩又查出嘉慶七八九等年馬邊越嶲辦理夷務

案內借支銀二千六百餘兩三共借支未扣銀二十六萬四千一百餘兩除前奉

恩旨寬免三成及嘉慶十一年二月以後續扣續繳並例應請免者共銀十萬四百餘兩外現在通共尙有未扣銀十六萬三千七百餘兩其例外借支者除全不合例及重支借墊銀二萬四千餘兩應令按限照數扣還無庸開列外其置辦衣履器械等項通共借支銀八萬三百餘兩已扣過銀三千七百餘兩尙有未扣銀七萬六千五百餘兩亦應在各兵名下扣還因例不開銷是以_臣上年勅保未經列入單內惟查川省兵丁自奉派出師臺灣巴勒布廓爾喀苗

御覽卷之六 前卷二十二
三
疆以至勦辦賊匪前後幾及二十年之久歷年復有馬邊
越僑臺灣甯陝節次調遣每奉征調一次卽有一次借支
前欠尙未扣清後欠又須起扣雖蒙

皇上恩施疊沛旣寬其年限復減免三成已屬至優極渥無如各
兵例餉無多扣項過重其苦累情形實屬不免相應繕寫
清單奏呈

御覽伏候

訓示

諭曰川省官兵借支未扣銀兩著再加恩查照陝省之例無論例
內例外官弁寬免十分之二兵丁寬免十分之三以示體卹

十二月軍政屆期

諭曰陝省地方現俱安輯德楞泰革職留任處分著卽開復

十三年戊辰

公六十四歲

八月公奉

旨查閱四川營伍事竣回陝旋以病陳請暫緩年班

陛見

上允之

十四年己巳

公六十五歲

正月公舊病增劇

上命公子蘇崇阿偕御醫馳赴西安看視並

親解佩囊及

內府藥丸

賜之

初三日

諭曰德楞泰於賊匪肆擾之際帶領將士一鼓殲除生擒著名首逆俾川西數十萬生靈免遭蹂躪厥功尤偉迨蕝事酬庸彼時朕意卽欲將伊與額爾登保加封公爵懋獎殊勲特以剿除內地亂民究非平定外域掃穴犁庭可比是以晉封一等侯日前

因德楞泰體氣虛弱恐發舊疾曾諭令撫臣常往看視今聞其
痰喘時作深爲廕念著加恩晉封爲三等繼勇公本身承襲准
再襲二十四次

三月初九日卯時公薨終於西安將軍署中正寢陝西巡
撫方維甸馳奏十六日奉

上諭西安將軍三等公德楞泰秉志公忠素諳輜略宜勞閭外懋
著聲威前於平定苗疆以後續經派令勦辦三省邪匪身先士
卒所向有功百戰辛勤備嘗艱險而潼河之捷當賊匪肆擾之
際一鼓掃除保全川西數十萬生靈勲績尤偉前經賞封一等
侯爵晉加官保並賜雙眼花翎紫綬本年正月間據方維甸奏

到德楞泰患病情形朕眷念盡臣篤施恩眷特晉封爲三等繼
勇公派伊子乾清門侍衛蘇崇阿馳驛前赴西安看視在彼侍
奉親解佩囊以賜並頒賞內府丸藥冀伊欣奉恩綸早就痊可
兩月以來據奏調理較前稍愈乃本日據方維甸奏報德楞泰
氣血久虧交三月後病勢日見沈重竟於初九日溘逝現已妥
爲照料令伊子蘇崇阿扶柩起程等語覽奏深爲震悼著派乾
清門侍衛內閣學士玉福馳驛迎至途中奠醢仍著步軍統領
衙門探明德楞泰靈柩將至京師時先於過西頂一二里外搭
蓋棚座暫爲安置屆時朕親臨賜奠後再令入城治喪並賞給
廣儲司庫銀五千兩俾伊家經理喪事伊子蘇崇阿本應襲封

公爵但從前額爾登保病故後伊子謨爾賚額係襲封侯爵德楞泰雖有軍功究在額爾登保之次蘇崇阿侯百日孝滿著襲封一等侯爵不必待至年終查辦所有德楞泰應得三等公爵卹典著該部察例具奏其任內降革處分悉予開復以示朕軫念前勞恩施罔斁至意欽此

禮部議奏請諡

賜諡壯果

四月

諭曰從前川陝楚三省教匪滋事額爾登保與德楞泰奉命出師其時額爾登保職司經略統握全機庸謨久歷厥功甚偉是以

於京城建設專祠用昭崇祀德楞泰身爲參贊督勵戎行執馘擒渠戰功屢著而潼河一役於賊匪肆擾之際不避鋒鏑一鼓殲除生獲著名首惡保障川西數十萬生靈免遭蹂躪此其勳績之最著者至今川省士民猶爲感頌德楞泰雖功在額爾登保之次而蜀中賴其保全自當於該處省垣建立祠宇以妥忠魂著勒保相度地基鳩工營造俾百姓中知感者得慰其瞻慕之忱卽或有不肖之徒震懾威靈亦可望而斂戢

是月公柩至西頂

上親臨奠醊

命入祀昭忠祠并

御製詩悼之恭錄

御製詩

將星隕落報秦郵褒鄂繼亡挽不留日下共推雙俊傑川中益
著大謨猷至今三省無遺孽憶昔八年未解憂賜奠靈前和淚
滴入祠晉爵舊勳酬

恭錄

諭祭文

維嘉慶十四年歲次己巳 月朔越 日

皇帝遣官

諭祭於太子太保內大臣西安將軍三等繼勇公諡壯果德楞泰

之靈曰功高敵愾實資貔虎之臣典渥褒忠不數麒麟之閣銘
太常而紀績威聲早肅於前茅緬上將之登壇勳望允侔於大
樹忽傷凋謝彌惜慙遺誕賁恩綸用頒奠斝爾德標泰奮身什
伍銳意韜鈴始列校以掄才迭膺器使旋總戎之受命勉效馳
驅當頑苗不靖之年隸麾下而先登有賞嗣邪匪肆行之日冠
軍鋒而轉戰無前克勵精誠助成戡定維昔潼河之役尤嘉保
障之功靜掃風塵合川陝楚而歡騰安堵飛馳露布超伯子男
而寵錫信圭宮秩分榮禁廷宿衛戎部號中樞之地式贊謀謨
文階列方略之編俾詳摩畫迨甯陝新兵之倂擾實朝廷大夏
所必施遽許投戈雖未宣威於柵鼓終令專閫猶將收效於桑

榆末疾俄嬰軫懷倍篤題封藥裏解賜荷囊命趨子職以承歡
詔益公封而示眷倏披封事遽失勞臣當五夜之星沈感一軍
而雨泣恩隆卹舊典茂飾終庀喪頒內府之金賜醢夙近郊之
駕專祠特建懷底定於三巴秩祀常昭獎盡誠於七字於戲聽
鼓聲而思將帥抒忠旣竭爾股肱盟帶礪以示子孫蠲吉更潔
茲芬苾靈如不昧庶克歆承

恭錄

諭碑文

朕惟龍韜展略湛恩用錫夫桓圭麟閣旌忠遺烈允垂於汗簡
戡定著前茅之績褒崇懷大樹之功載煩豐碑用光奕葉節德

楞泰系承閥閥才裕干城溯筮仕於

先朝早策名於分閫自頑苗豕突率什伍而奮勇先登洎邪匪鳴
張冒雪霜而勤殫搜捕參全軍之籌畫握勝算以馳驅終始一
心崎嶇百戰稍遲露版馮異垂翅於回谿卒掃星槍諸葛擒渠
於蠻洞威先壁壘氛息巖疆首標益部之功尤偉潼河之捷作
西南之保障活億萬之生靈凱奏歡騰合蜀秦楚而狼煙永靖
侯封寵錫由伯子男而虎節重頒揚翠羽之義冠控紫輶而照
路遂分榮於宮秩旋宿衛於禁廷方略成書並藉籌邊之筆中
樞贊政適當振旅之年迨夢絲偶起於新兵而重鎮仍資於宿
將牙旗直指衆盡投戈玉帳崇開民皆安堵亶勤劬之備至何

疾疢之俄嬰表殊眷而親解佩囊冀速痊而遞封藥裹承歡子
舍俾伸烏哺之私晉秩公銜益厚騰揚之報遽聞溘逝彌軫盡
誠頒內帑以治喪遣近臣而賜酹芬苾茂酬庸之典郊奠親臨
馨香揚戢暴之威蜀祠特建攷易名之故事獎敵愾之成勞撮
其生平諡曰壯果於戲爵分茅土守彝鼎而世荷龍光氣鎮河
山賁絲綸而永輝馬鬣欽茲休命勛爾後昆

十五年四月十八日午時葬於昌平州屬之白各莊

子蘇崇阿一品廕生

乾清門侍衛上駟院奉宸苑武備院卿

內閣學士兼禮部侍郎理藩院左右侍郎護軍統領副都統

成都副都統

盛京副都統署黑龍江將軍卒於將軍任

道光九年十二月十七日

諭曰蘇崇阿病故將伊長子倭什訥仍承襲一等繼勇侯

孫倭什訥一品廕生散秩大臣兵部禮部侍郎

經筵講官後官至杭州將軍卒於任次孫花沙納道光壬辰

恩科進士翰林院編修現官

經筵講官吏部尙書鑲藍旗漢軍都統曾孫希元襲一等繼

勇侯次希賢監生均倭什訥出希凱二品廕生現官兵部

員外郎花沙納出元孫世芬希凱出

咸豐二年十二月十四日

諭曰倭什訥病故將伊長子希元仍承襲一等繼勇侯

軼事

朝廷書大家庭誌小遺舊所述足示方來因於

方略

史傳及夙存

奏藁家飛行狀外隨記積錄別著斯篇

乾隆五十三年臺灣客民林爽文等聚眾亂

上命將軍福康安參贊海蘭察往征之公時以健銳營藍翎長從
至海濱風逆不得渡已數月而

詔屢促行福公奏言不日即可抵臺灣實駐師於舟而未揚帆也
俄有春君報曰聞寇且降行越海來矣福公方進食推案

大怒曰吾奉

命討賊未進師而賊已降其虛與實將何以對

朝廷顧蔡君言此事必探明君其宜往春君知是役之多凶少吉也因婉以公薦曰是誠勇而有謀勝此任無如德某者將軍喜甚遂趣公行公時方病瘧寒熱日數作又值海水盛漲風濤接天番舶絕迹往來舟子漁人皆遠遁避兵合軍盡爲公危公乃奉令卽慷慨行曰大丈夫當立功異域諸葛忠武五月渡瀘深入不毛馬伏波征五溪卽飛鸞亦跼蹐墮水中此正吾效命之秋也海公壯之因命其義勇之僕某從行比登舟榜人皆逃匿公乃搜瀕海老弱居

民得二百以充榜人舟輕不得平實以火藥及解維泛泛
若浮杯然而烈日燦空煙波無際遠近不見一帆櫓影俄
得風挂席瞬息風止黃雲又起島中作金沙色榜人驚曰
颶風至矣可奈何急卸帆下三椗椗以鐵力木爲之大如
屋梁巨艦有三欲泊則下之以注水底已而颶風果大作
晦冥如翳目不見掌駭浪驚濤搖撼如簸頃有商船二相
附一舟跼請哀號慘無生理公與某僕在舟中掀動不得
坐且值瘧病甫止暈而嘔吐水盡碧亦白念無生理與某
僕強起易新棉服爲葬魚腹計替亂之中困極假寐未數
刻醒覺舟不動驚詫瞻望開而篷窗之外已萬里一碧明

月流天矣於是羣起相賀曰微大人福吾輩久已魚鼈蓋
是時旁附二船已早不知存沒也起旋欲行見已爲風浪
拔其二惟其一不動二百人羣力振之不起中有老者止
之曰二旋已拔此一旋也勢愈單而仍不動者必有神物
衛之以護福人耳不必一旋之憂遂舍之數日至臺灣詢
問賊情並無欲降意而公竟以冒險徒行矣然公之忠勇
亦由此見推上下遠近云

公在臺灣時將軍以次必異禮之所陳之謀亦無不聽一
夕宿帳中兵備道某遣人餽酒二甕公辭之使者往來數
四皆不得命次日見將軍語次忽問曰昨有人餽君物乎

曰有之收乎曰未收何卻也曰彼餽以酒吾不飲故卻之
問見之乎曰吾不受何見之爲將軍笑曰非酒也命昇之
來啟視之旨饌充然將軍歎曰君誠廉潔人也彼所餽者
吾使以試之耳竟不受誠可嘉乃命左右出綵繪數事贈
之以彰清白云

川賊冉添元奸黠趨健冠諸賊善用伏陷官軍曾敗經略
兵於蒼溪號令羣賊橫行川東川北川西蹂躪數十州縣
馬蹏岡之役賊眾繇互數山伏萬人於岡後我兵四路進
攻賽冲阿等攻包家溝阿哈保等攻火石壩溫春等攻龍
子觀公督大隊直趨馬蹏岡已過賊伏數重始覺俄伏起

八路來迎棄馬步戰人持束竹溼絮以禦矢銃鏖戰三晝
夜鼓聲震地煙塵漲天賊兵多更番休息我兵飢疲甚各
路皆敗守備楊春和戰死公乃下馬率親兵數十據山巔
示必死冉添元督眾登山直取參贊銃子所至公帽沿前
後洞四穴擊胡牀足錚錚有聲眾色如土公安坐不少動
左右欲蔽公公叱去之已復上馬單騎大呼馳衝賊陣中
堅將士益奮鼓譟從冉添元馬跌下澗蘇爾森射而擒之
驗其右手果有箭傷至是賊瓦解我山後鄉勇亦至乘勝
逐北二十里飲羽怒追獲偽總兵解其順職旗手唐士林
探馬頭蘇如富劉文富等數百人初將戰添元謂其黨曰

官兵在川者惟德某可畏旦日戰退一步者斬我不擒德
某彼必擒我至是與官軍五日四戰誓致死無敢退賴公
鼓勇血戰破之爲賊起以來戰功最

詔晉封三等子公居常每日主帥者三軍之主宰也譬如四支百
體受命於心心動而身能受職者鮮矣是戰如此誠爲不
負亦以轉敗爲勝萬死一生兼有天幸也故保全川西蜀
人談之至今尙有生氣惜三省方略原疏中竟掩其前半
陷伏危急之形與再添元鋒銳洶洶之勢但稱遇賊接戰
擒獲渠魁其意蓋欲飾爲全勝不知盡失機宜反晦勞烈
也當日司奏記者才識未至公後充

方略總裁官亦未便陳改故論者謂陳琳徐涓幕府中固不可少其人也

先是賊渡嘉陵江而未至馬蹏岡也裹脅日眾遂由劍州之元山場向彭明江油而竄接應甘肅之賊公由廣元疾馳出江油之重華堰箐林口據龍安要路賊黨攻破烏龍寨游擊馬元德阜和把總陳啟珠戰死民請救兵至卽敗之五路賊眾俱集白家壩屯連九山約十數萬公誓眾曰賊勢方盛不挫其鋒西川危矣期今日戰敢退者斬吾亦不復反顧及戰賊張甚公曰不足破也惟銃矢須持滿賊近乃發馳之眾共奮有蟒袍草帽戴花翎賊首二分頭督

戰我兵馬隊擊其一縛之一中箭退復有花翎賊目中銃落馬卽曳去乘勢轉戰至新店子賊伏起賽沖阿溫春等俱被圍公大呼直入所向無敵圍乃解蓋生擒者線號陳得俸中銃者添元之弟添恆號四元帥箭傷者卽添元俱渡江五路著名首逆也賊敗去棄大礮於池中民趙廷文稟報撈獲西川之無恙全賴此戰

公威名著三省賊目之曰德不怕所用皆黑旗賊見旗號卽披靡我兵反不得擊一日與同好明公亮互易旗以試賊賊見明公旗果輕之與戰大挫旣而明公亦假公旗賊卻走熟視部伍有不同遂反戈相向而明公方奔馳不暇

矣後總督勒公因安縣喬莊之潰令提督七十五率桂涌等擊賊於黑河亦用公旗賊一見驚爲馬蹶岡勝兵又至卽奔我兵力追擒斬過半餘賊向甘肅文縣而逸

公家居不談戎馬休沐之暇輒聚家人講倫常究日用大旨不離乎道德者近是娓娓不倦旣暮命散去明日復然至今老婢舊僕猶能述之云

公征川楚時一日追寇遠芻糧有不繼士卒飢疲竟不能行搜行橐僅得乾麪一束左右以充公饌公歔歔不食黯然曰我兵飢吾安能獨食縱能具此食吾何能下咽乎竟不食其與士卒共甘苦如此宜其感泣奮興隨處效死弗

去也

飢人飽食每致傷生公深明其故當衆兵久飢極困時忽報糗糧至麪烙棋子公令人與一枚食之徧然後再與一枚全活無算飢困而不爲之亂其有所亂者鮮矣

公嘗患足疾不能行時軍事方嚴籌畫勞苦賊首不獲

朝廷時有

旨切責之公焦灼萬分偶熟睡見一白鬚老人謂之曰賊首已獲公胡高卧帳中也公曰吾足疾未能動履耳老人曰公疾卽愈無過憂公醒始知爲夢翌然而起帳外亦報曰賊首獲矣公不覺出視諸將隨卽稱賀公接見如平時咸驚問

公疾甚何以速瘳如此公以實告衆皆以爲忠義得神明之助後行山中過土地祠內有塑像白鬚飄然宛似夢中所見者

公凡勝賊臨陣所俘獲雖戰罷疲極必爲細心交訊未肯妄殺一人故每次率脫良民以千百數其有婦女被擄者則別爲一所起卧一夕女伴中有七人產兒衆惡之以爲軍家厭欲並殺公曰天地生人此祥也命老軍以銀米早爲護送使其一家完聚藉以撫育後數年凱旋過其地士民各具酒肉遮道迎有羣姬攜幼子數人泣拜馬前曰此子皆軍中所生公之賜也否則母子俱無矣公慰勞而遣

之

公至蜀中士民築高臺請公登而去其梯公問故曰萬民感戴欲圖公形以供奉恐公急去留之耳旋有畫工具紙墨丹青長跪摹寫畢乃設原梯請下其爲民仰慕敬重如此

馬蹏岡之捷餘賊散逃有零匪近千人竄入遂甯縣境縣令檄鄉團入衛城德盛寨首雷時行老儒也派勇五百名令武生某率其半先行而自領餘勇續進至沙溝先行者猝遇賊全軍覆沒武生歸賊不屈至剗其陰塞口以死時行後隊至所豎旗有德盛寨字且皁色賊一見驚呼曰參

贊大兵又至矣遂狂奔以是振旅入城不損一人旋塞時
方以縣令所犒牛酒花紅示得意而死事之二百餘家父
覓其子妻索其夫皆向時行哭且罵老儒情急不知所對
但憤擲其旗曰此德公誤我也

公少年困阨二十餘尚爲前鋒不得官一日前鋒校入選
擬正又失意自恨命中無祿欲自剄忽有道士從後批其
頰曰汝欲何爲天下大事待汝者多矣何不自愛惜如此
公乃驚悟然究不知道士爲何人也

公撫士卒甚慈惠軍中有疾病痛楚者必嘗親視醫藥時
訊問傷亡必痛哭流涕出於至誠曰吾之不善致陷汝等

於危地也故人以是感奮莫不用命

公天分過人幼時卽多智略善言辭里中有詬誶或大不平諸事咸曰此非某來不能排難解紛也公至果不數言卽各得而去

川中有公生祠六七處獨灌縣未另修祠聞當日士民因公軍行甚迫不及待遂就李二郎祠肖公像與神同龕亦佳話也其省城北門外之歡喜庵一祠壯麗崇闕爲公歿後勒公保奉

勒所建先君官成都副都統時每歲時展謁鄉民攜雞酒香火來祠供獻絡繹不絕庭前豐碑屹立其縱負幼孩而至者並

對碑焚獻令幼孩以首觸鼻厥叩頭問之皆曰欲藉公威
靈壓除關煞也其爲民所敬重如此

附錄

謹案公英風偉烈載在

國史及

純

睿兩朝平定內外諸方略可謂帶礪銘勳旌常著績卽詠歌所及
華袞爲榮亦無出

御製煌煌各巨篇然業垂斯世直在人心五十年來或冠裳簪接
或戰地重經或誦讀興懷傾服感慕學士大夫有不禁淋
漓濡筆者我

朝

稽古右文嘉道之交名世大家尤輩出乃就卓有才識不作酬獻
揄揚錄四章附於卷末亦以干城禦侮有南仲方叔而作
詩雅者初不閒

上下遠近也四章蓋於阮文達公摯經室陶文毅公印心石屋朱
伯韓侍御來鶴山房魏默深刺史古微堂諸專集各取一
首云

萬樹園

賜宴時蒙古王公及回部越南貢使皆列坐參贊侯德楞泰亦凱
旋紀

恩一首

儀役

阮

元雲臺

灤山秋霽

御筵開上將初銜飲至杯東走名駒大宛到北飛馴雉越裳來魚
龍戲畢諸藩拜薇芑詩成二雅材何幸使臣歸述職得叨
恩命共趨陪

梓潼過德將軍

楊泰

戰蹟碑作歌

有序安化

陶

澍

雲汀

嘉慶庚申春教匪冉添元偷渡嘉陵江擾及劍州梓潼
一帶川西大震將軍輕騎追及擒斬略盡土人感之立
是碑也

妖星夜向西川地長蛇吮人血流赭赫然一震迅雷霆將
軍旗鼓從天下憶昔么麼煽亂初祭酒鬼卒號烏烏始由

襄耶及唐鄧遂渡漢沔穿夔巫數千里內肆蹂躪勢若火
燎秋原枯卓哉將軍好身手長嘯欲激龍泉吼健銳固是
飲飛英叱咤曾令逆苗走有

詔將軍兵最精指揮更作巴西行西行幾載冒鋒鏑薊澗緣崖事

搜剔霜刀不放鯨鯢逃晴空屢見鷹隼擊將軍前後斬獲賊姚之富齊

王氏高均德高二羅其清冉文傳襲父王遂得籌參裴令

卜三聘楊開第龍紹周徐國謨間紹青遙看幟樹楊無敵謂提督楊公遇春三巴已靖

謂經略額公將人可耕移兵北向趨階成誰知晝伏夜復動窮穴突出颺

與鼙將軍聞之捲甲返疾馳颯若風雨聲是時羣賊正蠶

起我軍新敗鼓聲死總兵朱射斗戰沒於蓬溪參將以下死者十餘員欽鴟得意

毛羽張投鞭欲斷涪江水士女倉黃如亂麻牽衣跣足哭

不止將軍下令整旦嚴持滿勿發視吾矢餓鴟忽叫箭滿

眼十萬賊人同草靡

賊合黃號徐萬富青號汪癡綠號陳得俸等十數萬人蠡河迎戰將軍令

壯士持滿俟賊近乃發萬箭齊出遂擒陳得俸殲冉添恆冉添元帶箭而逃

窮追五日四接戰

手斬鴟狐戮封豕

賊自武連驛奔江油五日四戰射獲冉添元及楊正明陳國祥鮮其順等冉添

元善用埋伏為眾所推服既就擒賊遂大潰

輕騎進解四寨閉歡聲上沸天雲

委

白號賊張子聰雷世旺等渡潼河焚太和場追躡大破之斬雷世旺生擒數千人時谷成太和仁和仁義四寨

為賊所攻哭聲震地大軍至賊驚遁圍解難民萬餘詣營叩頭而去

潼河兩岸遂肅清

賊連敗於

中江三臺殺偽總兵張長生等餘賊搶渡嘉陵江追及擊以大礮礮溺殆盡自是賊不敢西渡望見將軍輒輒走蜀

人至今廟祀之重脫刀兵事耘耔嗚呼此戰何可無稍緩須臾蜀

危矣祇今事隔十年來陰雨猶聞鬼夜哀山坡往往拾遺
鏃斑斕血色凝蒼苔豐碑屹岬當道路惜無文字鐫崔嵬
碑上僅刻將軍官階及萬民感戴數大字我行棧道繚若線恍惚當年此酣戰
如公自是頗牧儔卻憶潢池誰召變教匪初起建白旗幾以官逼民反爲辭
人善學孫吳書不如且讀循良傳

新鐫歌

四十九章錄一

臨桂

朱

琦

伯韓

靖川楚

曩歲賊起長陽逼襄鄖煽動巴東楚豫何紛紛其時分路
進剿專責勒保惠齡暨宜縣先後調直省兵及禁旅索倫
糜帑三千餘萬曾未奏厥勳

睿皇帝四年始親政逮大學士珣責以欺罔專擅籍其門自今將

佐敢有玩兵養寇復通賄賂者其視珣二 迺詔百姓生

長太平豈知有兵半緣胥吏煎迫四散而忿爭朕日夜思

之恆痛心讞囚姑緩刑特獎良吏趙華與劉清三 新兵

毋再增客兵無輕調官兵屢決戰士兵爲嚮導凡爾鄉勇

其有挺身殺賊及陷賊死者大吏悉以告四

皇帝曰功之不蔽由任將非人爾參贊德楞泰累戰常冠軍爾都

統明亮持重能拊循爾額爾登保鯁亮忠勤爲諸將先賊

憚其威其授爲經略大臣五 於時麾下之士口羅觀曰

楊春遇若龍之蹲若龍之翼幕府之傑曰狼景曰嚴如一佐

蜀帥一控嶠函

六

爰議川以東參贊扼之川以西將軍

遇之餘匪入老林卒禽獮而薙滅之

七

七年十二月飛

章告捷

皇帝迺下明詔宣布中外頒爵元功暨諸將士以次各晉秩普免

天下租賦民大悅

八

讀

國史列傳君不見十六章

將臣六章相臣五章
督撫臣五章錄一

邵陽

魏源

默深

威勇侯額爾登保繼勇侯德楞泰

君不見猋猱楚蜀妖氛惡節制如山額經略血戰西川斬

京觀望旗爭避德參贊百戰天生戡難材賊平身死屯雲
雷東海長鯨作人立神弩射潮安在哉

廟堂此日思鼙鼓時危慘澹天風來

右年譜三十二卷皆集當日奏疏與所奉

綸言編次而成

公未弱冠起列校至封崇五等蓋終其身任在兵間某年日經某地歷某事具載

欽定各方略薈萃聯貫瞭於掌紋行述無其詳也故體例與古人年譜異歲丙辰

公孫松岑家宰延

璽

授兩姪讀芸窗畫靜館課多閒迺出原

纂商訂

璽

恭閱一過見本末完備敘次釐然惟採取書目

至二千卷有奇雖歷鄂方諸君之助定而不能全載以往間有舛漏勢無從按籍稽因重爲鱗比檢尋證以軍中自

存奏藁旁及魏氏源聖武記阿文成公桂年譜諸書與冢
宰往復討論又增六萬餘言複者刪之謬者正之殺青甫
就隨付剞劂凡十五閱月而成編竊維

公天生偉人爲

國戡亂其勲勞銘帶礪其德澤在人心冢宰讀名將鑿楹之書
箕裘丕振是篇所著允足昭積慶而表先芬獨三省之亂
逾十年

公一人實始終之而在我蜀爲最久功被生民亦於我蜀爲
最大幸藉翰墨微緣譜褒鄂事業焚膏繼晷矻矻窮年亦
庶酬遺澤之萬一也方今粵匪跳梁軍興數載尙煩

宵旰蓋鼓鼙思將帥每飯在鉅鹿矣讀是譜攬轡澄清亦有感
發而興起者乎方有淋漓濡筆以待平淮之碑者不惟下
士之傾慕已也

咸豐七年丁巳小陽月蜀東王正璽謹跋於懷芬館寓